

EM2017/53
18. oktober 2017
Michael Rosing
Attaviitsoq

Ingerlatseqatigiiffiit tamakkiisumik killilimmillu akileraartussaataasut il.il. akileraarutaassa ulloq 1. januaari 2019 aallarnerfigalugu 20 procentimut appartinneqarnissaanut isertitanut akileraarut pillugu Inatsisip allannguutissaanik saqqummiusseqqullugit Naalakkersuisut peqquneqarnissaannik Inatsisartut aalajangiiffisassaattut siunnersuut.
(Inatsisartunut ilaasortaq Randi Vestergaard Evaldsen, Demokraatit)

Akileraarutitut ajornartorsiutaavoq qaffanneqaraangata isertitassat ikileriaannangortarnerat, aningaasarsiornissaq orniginarunnaartarmat taamaasillunilu akileraarnissamut tunngavik millisarluni. Inuit akileraarutaat aamma ingerlatseqatigiiffiit akileraarutaat eqqarsaatigalugit taamaappoq. Ingerlatseqatigiiffiit akileraarutaat eqqarsaatigalugit allamik ajornartorsiutitaqartarpoq, tassani sulliviup ilaa nunamut allamut nuunneqariaannaasarmat, akileraarfiunikinnerusumut. Ajornartorsiut tamanna takusarparput Kalaallit Nunaanni, tassani assersuutigalugu akilersinnaanerusarmat sullivimmik Danmarkimiititsinissaq avammut aalisakkanik tuniniaasumik Kalaallit Nunaannut naleqqiullugu minnerusumik ingerlatseqatigiiffittut akileraartoqartarmat. Allaat oqaatigineqartarpoq tamannarpiaq pissutaaqataasoq aalisakkanut akiluttorfigineqartarnitsinnut.

Uanga nammineq qularinngilluinnarpara Kalaallit Nunaannut iluaqutaassagaluartoq ingerlatseqatigiiffinnut akileraarutit appartinnissaa. 20 %-nngortinneqassanersoq kiisalu 2019-mi januaarip ulluisa allaqqaataaniit taamaalissanersoq oqallisigineqarsinnaavoq. Paarlattuanilli aamma Naalakkersuisut isumaqatigaakka eqqarsarmata pitsaanerpaassasoq ataatsimoortumik pingaarnersiuingaanni taamatullu akileraariaaseq nalikilliliisarnerlu ataatsimoortillugit misissorneqartuuppata, ingerlatseqatigiiffissuit akileraarutaat il.il. Kisianni malunnarpoq imaaliallaannaq anguneqarnaviangitsoq taamaattumik annikitsukkuutaarlugit suliarerusunneruakka soorlumi siunnersuummi tamanna pineqartoq.

Taamaattumik aappassaaneerisoqannginnerani siunnersuut Akileraartarnermut Aningaasaqarnermullu Ataatsimiititaliamut innersuuppara.